

## ԵՐԿՈՒ ՀՈԳԻ

(Իր տաղանդավոր պաշտպան Գրուզենբերգին)

Մարդիկ կյանքում իրար համար  
 Ամեն մի տեղ ու ամեն օր՝  
 Որը ուժեղ, որը տրկար՝  
 Կամ պաշտպան են կամ պրոկուրոր:

5 Մինը գիտի լոկ շար վայրկյան  
 Եվ շարագործ ու թըշնամի,  
 Մյուսը հոգին հավերժական  
 Ու պատճառը դժբախտ ժամի:

Մինն իր առջև տեսնում է ցած  
 10 Մի հանցավոր խավար ու կույր,  
 Մյուսը՝ իր պես մի արարած,-  
 Ծընող, որդի, եղբայր կամ քույր...

Մինը մարդու օրենքն ունի,  
 Որ միշտ մարդուն ցավ է բերում,  
 15 Մյուսը մարդու և Անհունի,  
 Որ և անհուն սեր է բուրում:

Եվ օրհնեալ է, ով այդ սիրով  
 Կյանքի ճամփում ընկնող մարդուն  
 Պաշտպանում է եղբոր ձեռով,  
 20 Տանում դեպի խաղաղություն:

Եվ խաղաղ է նրա հոգին  
Կյանքի ամեն ասպարիզում,  
Եվ թե երբեք հուզվում է նա,  
Սերն է միայն նրան հուզում:

25 Ահա ինչու էս աշխարհքում  
Խաղաղ է միշտ և իմ հոգին,  
Պաշտպանում է նա իր խորքում,  
Սիրում է ողջ ու ամենքին: